


**Ta invita Aruba completo diarazon awor 6:30PM den
Kamerlingh Onnestraat**

Manifestacion cultural grandi pa Lio Booï

Anochi lo cera cu presentacion di Rincon Boyzz

STA. CRUZ -- Diarazon awor dia 25 di Juli ta exactamente 93 aña cu Hubert Obdulio "Lio" Booï a nace na Bonaire, pa cual a prepara un homenahe special na dje dilanti su cas situa den Kamerlingh Onnestraat dilanti veld di RCA. Un cantidad di invitado for di sector di Gobierno y famia for di Bonaire, Corsou y Aruba lo ta presente for di 6:30PM te cu 10:00PM pa hunto celebra e cumpleaños, pero tambe e logronan y tur e trabaonan cu Lio Booï a desplega tanto na Bonaire como na Aruba. E evento lo conta cu presentacion di caha di orgel di Nelson Sprock, presentacion di De Trupialen, baile di Diana Antonette y Nico Luidens compaña pa Tino Ruiz, canto di Roy Sneek, presentacion di Coro Melodia, Coro Melange, poesia di Dolfi y Belen Kock, presentacion riba piano di Livio Hermans, canto di Jossy Brokke, Robert Maduro y su Alma Folklorico, presentacion di Vivian Lampe riba piano, Etty Toppenberg y Trio Huasteca, Tipico Cadushi y pa cera e anochi cu



presentacion di Rincon Boyz. Claro cu separa di e parti musical, lo tin e parti protocolario tambe den cual lo conta cu presencia y discurso di diputado di cultura di Bonaire, Gezaghebber di Bonaire y tambe Minister Presidente di Aruba, mr. Mike Eman. Mester menciona cu a manda invita Gobernador di Corsou, esta mr. Fritz Goedgedrag, cu tambe ta un Boneriano. E conocido historiador Boneriano, esta Boy Antoin tambe lo ta presente na e ocasion special aki. Mester menciona cu separa di e parti musical y protocolario, cu tambe a corda riba un cushina debidamente bon surti cu tur sorto di cuminda for

di Bonaire y Aruba. Asina nos por muestra e union cu tin entre e dos pueblonan. Preparacionnan ta canando den full swing pa duna Lio Booï un homenahe bon mereci pa tur su añanan cu el a dedica na nos cultura, di ambos pais. Booï a traha 23 aña na Hollandsche Bank Unie despues na WEB, Toeristenbureau, A r u b a a n s e Voorlichtingsdienst, Departamento di Cultura, Instituto di Cultura te cu aña 1980 ora cu el a baha cu pensioen. Hubert Booï a compone e di tres couplet di e himno nacional di Aruba, el'a compone e himno nacional di Bonaire "Tera di Solo", sin lubida su envolvimento activo como actor, autor y poeta, pintor, musico, orador y declamador. Su famia lo ta masha gradici pa e sosten y homenahe special aki, specialmente cu tin yiunan y famia biniendo for di Bonaire y hasta for di Hulanda pa e ocasion special aki. Lio Booï ta un figura bon conoci riba nos isla y merecedo di un homenahe pa tur loke el a haci pa nos.